

## ԱՐԱՄ ԳԱՄՊԱՐՅԱՆ (ՀՀ ԳԱԱ ԱԻ)

### ՎԵՐԱԲՆԱԿԵՑՈՒՄԸ ՈՐՊԵՍ ԱԼԺԻՐԻ ԳԱՂՈՒԹԱՑՄԱՆ ՀԻՄՆԱԿԱՆ ԱՐԴՅՈՒՆՔ

Ալժիրի գրավումից անմիջապես հետո Ֆրանսիան սկսեց երկրի տնտեսության յուրացումը և հպատակեցումը, և որքան էլ որ լինեք դրա չափերը, Ֆրանսիայի նվաճման կարևորագույն արդյունքը պետք է համարել վերաբնակեցման քաղաքականությունը: Ալժիր ներգաղթած եվրոպացիները կազմեցին գաղութային համակարգի հիմնասյուններից մեկը, դրանով ապահովելով և արագացնելով երկրի տնտեսության հիմնական ճյուղերի մոնոպոլիզացիան ֆրանսիական կապիտալի կողմից: Եվրոպացիների վերաբնակեցումը և հաստատումն իր անմիջական ազդեցությունն ունեցավ նաև Ալժիրի քաղաքական, մշակութային, և հասարակական կյանքի գրեթե բոլոր ոլորտների վրա:

Մինչև Ալժիրի գավթումը եվրոպացիների թիվը երկրում չնչին էր. 1730 թ. նրանց թիվը կազմում էր 2000, իսկ 1788 թ. նրանց թիվը պակասեց՝ հասնելով 500-ի: Վերջիններս հիմնականում ալժիրիցի ծովահենների կողմից գերեվարվածներն էին<sup>1</sup>:

Ֆրանսիական գորքերի ներխուժումից հետո եվրոպացիների թիվը սկսեց աճել: Սկզբնական շրջանում դրանք արկածախնդիր մարդիկ էին, որոնք ցանկանում էին օգտագործել իրենց համար ստեղծված բարենպաստ իրավիճակը: 1831 թ. եվրոպացիների թիվը չէր գերազանցում երեք հազարը, իսկ արդեն 1834 թ. այն հասավ 9700-ի: Նրանք հաստատվեցին ֆրանսիական բանակի վերահսկողության տակ գտնվող ծովափնյա քաղաքներում: Անհրաժեշտ է նշել, որ Ալժիր մուտք գործած եվրոպացիների հիմնական զանգվածը կազմում էին բանվորները, քաղաքային աղքատները և հողագուրկ

---

<sup>1</sup> Ланда Р. Г., Борьба алжирского народа против европейской колонизации (1830-1918), Москва, 1976, с. 78.

գյուղացիները՝ Ֆրանսիայից, Իսպանիայից, Իտալիայից և Մալտա կղզուց: Ֆրանսիացի գաղթականները կազմում էին ընդհանուր թվի միայն մեկ երկրորդը<sup>2</sup>:

Հստակորեն կարելի է նշել, որ հենց առաջին տարիներից ֆրանսիացիների վերաբնակեցումն Ալժիրում կրում էր ծրագրավորված բնույթ: Այդ մասին է վկայում, օրինակ, Ֆրանսիական բանակի հրամանատար և Ալժիրի նահանգապետ գեներալ Բյուժոի ծրագիրը, համաձայն որի գաղութացումն արագացնելու և հեշտացնելու նպատակով առաջարկում էր Ալժիրում հիմնադրել, այսպես կոչված զինվոր գյուղացիների բնակավայրեր, որտեղ նախատեսվում էր բնակեցնել ֆրանսիական բանակի վետերաններին<sup>3</sup>՝ դրանով իսկ լուծելով երկու կարևոր խնդիր՝ ապահովել ֆրանսիացիների և պահեստազորի մշտական առկայությունը:

Սակայն այս ծրագիրն աջակցություն չգտավ Փարիզի կողմից, ինչը դրդեց տեղի վարչակազմին ամեն կերպ խրախուսել և աջակցել քաղաքացիական վերաբնակեցմանը:

Այդ նպատակի իրականացման համար Ալժիրի գաղութային իշխանություններն Ալժիր, Օրան և Ֆիլիպպիլ քաղաքների շրջաններում գտնվող 124 հազար հեկտար հողատարածքներ հատկացրեցին ներգաղթյալներին: Վերաբնակեցվածներին տրամադրվելու էր անվճար 4-12 հեկտար հողաբաժիններ՝ պամանով, որ վերջիններս պարտավորվեն մշակել և մշտական բնակություն հաստատել հատկացված տարածքներում<sup>4</sup>: Չնայած այս հրապուրիչ առաջարկին, ֆրանսիացիները չէին ցանկանում հաստատվել Ալժիրում: Դա էր պատճառը, որ վարչակազմն սկսեց խրախուսել ոչ ֆրանսիացի եվրոպացիների ներգաղթը, մասնավորապես իսպանացիների, որոնք դեռևս մինչ Ֆրանսիայի ներխուժումը բնակություն էին հաստատել Օրան քաղաքում: Ալժիր սկսեցին ժամանել ոչ միայն եվրոպացիներ Իսպա-

---

<sup>2</sup> Ланда Р. Г., նշվ. աշխ., էջ 78:

<sup>3</sup> Ageron Ch. R., Modern Algeria, A History 1830 to the Present, Hong Kong, 1991, p. 25.

<sup>4</sup> Ланда Р. Г., նշվ. աշխ., էջ 77:

նիայից, Իտալիայից և Մալտայից, այլ նաև գերմանացիներ, շվեյցարացիներ, հույներ և նույնսիկ իռլանդացիներ:

Այսպիսի հետևողական ներգաղթի հետևանքով եվրոպացիների թիվը աճում էր հետևյալ տեմպերով:

Ալժիրի եվրոպացի քաղաքաբնակները<sup>5</sup>

|        | Ֆրանսիացի | Իսպանացի | Անգլիացի | Իտալացի | Մալտացի |
|--------|-----------|----------|----------|---------|---------|
| 1831թ. | 1020      | 500      | 117      | 262     | 213     |
| 1841թ. | 8747      | 4671     | 2483     | 2402    | -       |

Արդեն Ալժիր ներգաղթի առաջին տարիներին եվրոպացիների մեջ տեղի ունեցավ բնակեցման վայրերի և մասնագիտությունների ընտրության յուրօրինակ բաժանում: Ֆրանսիացիները, որոնց մեջ գերակշռում էին զինվորականները և պետական ծառայողները, հաստատվեցին Ալժիրում և նրա շրջակայքում, իսպանացիները մեծամասամբ գտնվում էին Օրան քաղաքում ու զբաղվում էին հիմնականում այգեգործությամբ, ձկնորսությամբ ու արհեստագործությամբ: Մալտացիները գերակշռաբար առևտրականներ էին ու անասնապահներ էին և բնակվում էին Բոն նավահանգստային քաղաքում: Իսկ ինչ վերաբերում է իտալիացիներին, ապա նրանք ևս առևտրականներ էին և ձկնորսներ<sup>6</sup>:

Անհրաժեշտ է նշել, որ Ալժիրի եվրոպական բնակչությունն իր մեծամասնությամբ աղքատ էր: Եվ ընդհանրապես, վերջիններիս կյանքը բավական երկար ժամանակ անվտանգ և ապահով չէր: Եվրոպացի գաղթականները մահանում էին ապստամբ ալժիրցիների ձեռքից, հիվանդություններից և չքավորությունից: Դա էր պատճառներից մեկը, որ վերաբնակեցվածների միայն 10 տոկոսն էր խիզախում ապրել գյուղական վայրերում:

Եվրոպացի գաղթականներն իրենց դիրքերը որոշակի ամրապնդում զգացին միայն Էմիր Աբդ ալ-Կադրի պարտությունից (1847) և ազատագրական պայքարի ճնշումից հետո:

<sup>5</sup> Guiard C. R., Des Européennes en situation colonial, Algérie 1830-1939, Presses Universitaires de Provence, 2009, p. 21.

<sup>6</sup> Ланда Р. Г., История Алжира XX век, Москва, 1999, с. 17-18.

Ալժիրի գաղութացումը շարունակում էր մնալ կենտրոնական իշխանությունների գլխավոր խնդիրներից մեկը: 1848 թ. Փարիզյան աշխատավորների ապստամբությունից հետո Երկրորդ հանրապետության խորհրդարանը որոշում ընդունեց 50 միլիոն ֆրանկ տրամադրել վերջիններիս ազատվելու համար: Մոտ 100 000 անգործ արհեստավորներ և աշխատավորներ դիմեցին Ալժիրում անվճար հողատարածքներ ստանալու համար: Ի վերջո 20 000 վերաբնակ, որոնցից 15 000 Փարիզից էին, բնակեցվեցին Ալժիրում հիմնված նոր գյուղերում: Այս նորաստեղծ համայնքները, որոնց բնակիչների գերակշիռ մասը գաղափար չունեին հողագործության մասին և առանց իշխանությունների հովանավորության, թողնված բախտի քմահաճույքին, ընկան դժվարին կացության մեջ: Կարճ ժամանակում 3000 մարդ մահացավ, իսկ 7000-ը վերադարձան Ֆրանսիա<sup>7</sup>:

Ֆրանսիացիների մեծ մասի ներգաղթն Ալժիր պայմանադրված էր ոչ թե շահախնդրությամբ, այլ սոցիալ-տնտեսական և երբեմն նույնիսկ քաղաքական պատճառներով: Ինչպես օրինակ, 1851 թ. Լուի Բոնապարտի (Նապոլեոն III) կողմից հանրապետական կարգի կողմնակիցների արտաքսումը<sup>8</sup>:

Այսպիսով, ֆրանսիական իշխանությունների վարած հետևողական քաղաքականության արդյունքում հնարավոր եղավ ոչ միայն հավասարեցնել ֆրանսիացիների թիվը մյուս եվրոպացի վերաբնակների հետ, այլ նաև հետագա տարներին գերազանցել վերջիններին:

| Թվական  | Ֆրանսիացի | Արտասահմանցի | Ընդհ.                |
|---------|-----------|--------------|----------------------|
| 1871 թ. | 130.000   | 115.000      | 245.000              |
| 1881 թ. | 230.000   | 182.000      | 412.000              |
| 1911 թ. | 563.000   | 189.000      | 752.000              |
| 1936 թ. | 819.000   | 127.000      | 946.000              |
| 1954 թ. | 913.000   | 71.000       | 984.000 <sup>9</sup> |

<sup>7</sup> Ageron Ch. R., նշվ. աշխ., էջ 30:

<sup>8</sup> Sperber J., The European Revolutions, 1848-1851, Cambridge, 1994, p. 270.

<sup>9</sup> Guiard C. R., նշվ. աշխ., էջ 25:

Ֆրանսիական բանակի հաղթանակից հետո ֆրանսիայի իշխանություններն սկսեցին Ալժիրի արդիականացումը և եվրոպականացումը: Տնտեսական առումով այն նշանակում էր հողերի վերաբաշխում: Համաձայն 1840 թ. հրամանագրերի ֆրանսիական վարչակազմը բռնագրավեց դեյի, բեյերի, և ֆրանսիական զորքերի դեմ կռվող ցեղերի հողերը<sup>10</sup>: Դրա հետ մեկտեղ եվրոպացիները նաև հողերը գնում էին, ինչն առավել մեծ չափերի հասավ արաբների ազատագրական պայքարի ճնշումից հետո: Սակայն, վախենալով որ այսպիսի տեմպերով ալժիրիցիները հողագուրկ կդառնան, ինչը կհանգեցնի նոր ապստամբություններին, Նապոլեոն III 1863 թ. հայտարարեց, որ տեղաբնակ ցեղերը այսուհետ համարվում են իրենց հողերի միակ և անփոխարինելի սեփականատերեր<sup>11</sup>: Այսուհանդերձ, եվրոպացիներին պատկանող հողերի քանակը արագորեն աճում էր: 1830-1870 թթ. ընթացքում գաղութարարները տարբեր միջոցներով յուրացրեցին 750 000-ից ավել հեկտար հողատարածք<sup>12</sup>: Ֆրանսիական իշխանությունների և անհատների ձեռքում հայտնվեցին Ալժիրի լավագույն ու բերրի հողերի կեսից ավելին:

Գրավված տարածքների ինտենսիվ տնտեսական յուրացումը ճանապարհների, կամուրջների, շինությունների, երկաթուղային գծերի կառուցումը արմատապես փոխեց երկրի ողջ շրջանների բնույթն ու պատկերը՝ դրանք վերածելով, այսպես կոչված «օգտակար Ալժիրի», որը ծառայում էր ֆրանսիայի և ֆրանսիացիների համար՝ երկրորդ շարք մղելով տեղաբնիկներին:

Այսուամենայնիվ Ալժիրի գաղութացումը շատ բան տվեց նաև Ալժիրին: Հենց սկզբից ալժիրցիները ծանոթացան եվրոպական գիտությունները ու տեխնիկային, հողագործական նոր սարքերին և այլ բազմաթիվ նորարարություններին: Հետագայում այս ամենը հանգեցրեց երկրի տնտեսական զարգացմանն ու արդիականացմանը, տեղացի-

<sup>11</sup> Le Sueur J. D., *Algeria since 1989: Between Terror and Democracy*, Nova Scotia, 2010, p. 6.

<sup>12</sup> Ланда Р. Г., *Борьба алжирского народа против...*, с. 72.

ների ներգրավմանը համաշխարհային քաղաքակրթությանը, ինչպես նաև մուսուլմանական միջավայրում նոր սոցիալական կառուցվածքի, խավերի և հարաբերությունների ստեղծմանը:

Այսպիսով, Ալժիր ֆրանսիացիների և եվրոպացիների ներգաղթն ու մշտական հաստատումը, էական և հսկայական ազդեցություն ունեցավ ոչ միայն Ալժիրի հետագա պատմական զարգացման ողջ ընթացքի վրա այլ նաև փոխեց երկրի կերպարը՝ վերածելով այն յուրահատուկ եվրոպական, մուսուլմանական համադրության ու ապահովելով Ֆրանսիայի գաղութային իշխանությունների և ֆրանսիացիների երկարատև ներկայությանը Ֆրանսիական Ալժիրում:

**ARAM GASPARYAN**  
**(IOS)**

**THE RESETTLEMENT AS THE MAIN CONSEQUENCE OF  
THE COLONIZATION OF ALGERIA**

The French and European immigration to Algeria and permanent residence had a significant and enormous impact not only on the further historical development of Algeria but also changed the image of the country turning it into a unique European, Muslim combination and providing the French colonial authorities as well as the French long-standing presence in Algeria.